

江西詩徵

江西詩徵卷二十一

南城曾燠賓谷編輯

宋

黃文雷

文雷字希聲號看雲南城人與金谿趙崇嘏寧都
曾原一南豐譙祐號江西四大詩人登淳祐十年
進士辟臨安酒官舟歸次嚴陵灘溺死有看雲小
集

晚立

獨遊得荒蹊晚意與心會水聲遠繞崗山色靜可對鳥語
林塘邊犬吠籬落外柴門未須關月在東峰背

西域圖

大哉天地間品類不可齊誰爲好事人貌此縣度西松花
瑣碎沙草肥是間可牧羊千蹄可憐羣鹿正走險或爾剥
割衣其皮啜湏樹樺尙有理穴賴挿齒吁何爲吾聞中原
全盛時重譯四走朝京師懷方象胥飭乃事幻人詭伎何
能奇還君此畫雙涕淚願賦周官王會詩

二喬圖

翔龍下卷江東土孫郎初得喬家女喬家本是重曹瞞隻
雞斗酒空酸楚衿情正用留阿瑜尙得人前稱肺腑百年
王氣竟消沈妙寫丹青嬌欲語香閨擲管記何書並帶笑
蓉按花譜那知不是未嫁時本末無從彤史補詞人多事

管閒愁銅雀紛紛底歌舞儘強被髮向黃墟只與東阿傳
洛浦

昭君行

自石季倫始賦昭君曲以後作者寢多不容措手
每恨沿襲之誤作漢初和親意著詠非也又按竟
寧元呼韓邪旣壻漢氏其年五月宮車晏駕矣因
併著之不惟祛詞人之失亦以解昭君於地下云
君不見未央前殿羅九賓漢皇南面呼韓臣無人作歌繼
大雅至今遺恨悲昭君內殿春閑闕馮傳掖庭新花隔烟
霧嫖姚枉奪燕支山玉顏竟上羶車去人生流落那得知
不應畫史嫌蛾眉癡心只恐琵琶語歸夢空隨鴻雁飛穹

廬隨分薄梳洗世間禍福還相倚上流厭人能幾時後來
燕啄皇孫死野狐落中高臺傾宮人斜邊曲時平千秋萬
歲總如此誰似青冢年年青

往年因讀岳王傳嘗爲之賦今過東林睹其遺像感
而申頌之

欲壞長城豈自由江人重唱白符鳩熏天富貴還須盡從
古忠良類若讎獄吏但能書牘背相公終欲割鴻溝書生
志念閑無用長想朱雲地下遊

和陶

志士方進身恨不以羽飛束縛歸山岡竟爲人所悲白楊
夜蕭蕭顧此何足依百歲會有盡智愚同所歸奈此後之

人未老形已衰有酒不暇飲而恐心事違

林表有宿鶻谷鳥相啾喧聽此心煩勞啟窗西南偏天氣
總未佳白雲生隴山欲訪雲閒人雨至或未還撥灰書且
住首肯心中言

黃河一再清似是上古時風雅久已降後來無文辭清風
日淪落世道皆如茲工華不工實此語我所疑文章有心
印詩人端不欺但恨智者少吾亦少罕之

上有碧松林下有白石道中有學仙人自號枯松老蛻身
千歲餘坐息如木槁面日劇嚴冷但道空虛好袖出天甲
書意色輕鴻寶此老誠可人吾欲從師表

歲晚歸自臨川

半世生羣盜窮年見亂離出門偏念母挾策欲干誰雪重
人蹤絕山寒火氣低平時來往地滿目盡憂疑

東塘舟中

初識東塘路言尋橋李船魚鹽千古地吳越一家天夢覺
何爲者行藏不偶然半溪疎竹影相送海雲邊

偕周伯弼題天申宮蘇文忠公畫像

大澤沾荒裔靈山識老臣微茫雲外迹衰病瘴中身溼草
寒碑夕晴花午殿春高簷風雨斷猶避六丁神

登樓有感

顧陸風流幾夕陽桑疇麥隴自淒涼山從地盡雲垂海水
共天浮日射洋門卒何年隱吳市嗇夫當日愛桐鄉蟻封

未敢誇榮策芳草無人且自芳

錢氏故園

幾年聞此好名園平地點巫翠掃天蕭岸半摧欂影暗亂
蟄閒自點湖煙

中興次輔巧玲瓏尙帶承平艮嶽風一朵慶雲飛不去遊
人眼冷夕陽中

謚 帖

祐字自求號桂舟又號服耕子南豐人幼耿舉子
業窮經博古不求仕進年八十六以布衣終有桂
舟遺稿

勸農曲

山花笑人人似醉勸農文似天花墜農今一栢間勸官吏
瘠民肥官有利官休休民休休勸農文在牆壁頭官此日
民此日官酒三行官事畢

高仁邱

仁邱安福人能詩嘗采康衢謠以下至唐末諸詩
其七十卷名吹萬集

題鳳林橋

一道長虹跨北河往來憑此涉清波帆從寶相叢中度人
向金鼉頂上過此日高車題字少昔年驅石叙功多鳳凰
已去無遺響只此江鷗答棹歌

姚勉

勉字述之一字成一高安人寶祐元年廷對擢第一除校書郎兼太子舍人以忤賈似道免歸卒有雪坡集

日食罪言

皇帝十四載新元紀嘉熙仲冬戊寅朔午漏方中時朔風震邱壑猛籟號枯枝黯如欲雪天四野昏垂垂晝炊煙始息暝色來庭帷雞登杙檝立鳥急林梢棲頗訝南至後晷度宜舒遲胡爲景尙促疾甚駒隙馳兒童忽走報白璧無全規倉忙出仰視如月初蛾眉金烏失彩玉象潛光輝蒼天玳瑁色列宿爭依稀老稚相喧呼伐社沸鼓鼙不知何物恠掩此清陽暉吾聞陰陽家日月以歷推日遲月行

速羸縮數不齊遇朔必會合差忒無毫釐氣盛或相掩二
曜斯一虧望日日掩月陽感陰故衰朔日月掩日陰盛陽
乃微又聞玉川子月蝕曾有詩謂此日月者天眼生東西
兩眼不相攻相食其說非食月乃蟆精伊感蓋自貽吾觀
作詩人志各有所之玉川特寓諫假此爲之辭日月有蟾
烏此事本怪竒况自食其光安能走而飛書稱辰弗集天
象昏且迷則知交相食此說當勿疑思旣得其說傷心重
嗟咨曰爲衆陽宗萬象皆影隨今者何不臧陰精奪炎曦
仰空不能救涕泗紛交頤嗟嗟今之歲天屢彰其威星文
沓示變雷震海失宜越在夏五月鬱攸煽京畿六月旣望
後月蝕主旱飢今茲復日食災異何繁滋天意不虛示坐

井聊管窺卽天以論人日君而月妃闕雖哀窮窳意在賢
才患靡曼或盈前必爲物欲移今者日之蝕或恐由宮闈
然而吾君聖未必耽燕私君象日而尊臣象月而卑正心
在朝廷昭德可塞違國柄或竊弄耳目相蔽欺今者日之
食亦恐由羣兒然而吾君明朝豈容盲癡中國猶太陽國
勢憂陵夷方今北有警負壘驚邊陲戰士怯不勇朔馬紛
騶嘶今者日之蝕或由邊事危然而吾君武安肯假寇資
重念此三者急務誠在茲萬一或有是是卽變所基應天
不以文減撤徒兒嬉如人喪厥明必求良藥醫一片葵藿
心祗恐天未知何當排閭闔碎首彤玉墀一篇痛哭策歷
寫心傷悲一者何所陳無逸爲元龜暗室屋漏中肅如對

神祇願爲楚莊王規諫從樊姬毋效漢成帝溫柔老昭儀
天君必清徹智燭光發揮如日麗中天煌煌明作離二者
何所陳用賢登臯夔選衆立一相國論公主持烏臺執白
簡妙選剛正姿戚里勿柄授貂璫毋印纍朝廷豁氛翳在
位銷脂韋末光依漢曰天子是倚毗三者何所陳張皇吾
六師擊楫如逖輩天寵昇節麾賣國若檜等電掃無孑遺
練軍明賞罰勇銳奔熊羆南越頸可纓中行背必咎如日
照霜雪殄滅何難爲凡此三說者中心久思惟明白可舉
行匪曰徒費詞能轉亂爲治可回災爲釐不學后羿射不
效夸父追捧輪上扶桑洗光出咸池蒼生照共仰九土光
咸晡五色太平象重暈中興期昊穹耀華彩萬國長瞻依

同張公望湖上避暑到四聖觀招栢堂月潭二道士
出飲

清晨有客來畏暑思避地涼多獨湖上一棹拍空翠長堤
無楊柳餘雨在荷芰炎蒸俱已失滿抱足清意頗思孤山
頂有客具高致扣門聞琴聲便覺洗塵累湖邊出問酒飲
興隨所至池鮮煮珍甘水果剥香脆好風林外來吹面涼
不辭清談詣物表絕不挂世事盡舫何人斯簫鼓正喧沸
清遊彼應笑世味吾不嗜尙思攜枕簟同叩竹間寺從今
日日來莫厭驚晝睡

禽言

不如歸去

翠煙深樾江村雨蜀鬼催春勸歸去勸春春去勸未休客
子傷春慘心緒只今蜀土錦城荒蜀客望西悲故鄉故鄉
蜀客歸不得何況當時蜀帝王

麥熟也哥哥

晨興涼潤疑秋肅格磔鞦韆叫雲木似催農父急腰鎌村
北村南麥皆熟屋頭場地初雨乾柳聲拍拍兒童歡田家
未敢冀一飽父老相呼先了官

看蠶娘子得幾許

流鶯前身織絲女猶拋金梭學機杼隔窗嬌喚看蠶姑娘
子看蠶得幾許今年蠶怪熟處稀採餘桑葉青滿枝一年
養蠶四番熟安得長似開元時

婆餅焦

趁晴割麥收雲黃
熬蘆新熟餅餌香
阿婆炙餅半焦赤
阿婦罵兒嗔不食
山禽戲語婆勿嗔
有餅可焦猶食新
西家割遲麥爛死
婦姑對泣空酸辛

提葫蘆沽美酒

晴煙如潑春光濃
萬花笑日爭嫣紅
百金沽酒直取醉
有酒不醉孤東風
不如送我豐年願
秫米價如黃土賤
家家有酒不用沽
何用提葫苦相勸

百舌

百禽巧作百種音
一禽却學百種禽
晴風暖日意自樂
圓吭變換皆清吟
多能不如止一得
多言不如止一點
一朝

江表集卷二十一
閉口不敢聲莫有讒人在君側

次韵友人示詩集

去歲春風客帝京西湖烟雨過清明蘇堤畫舫春三月天
竺清鐘夜五更行李裹書歸舊隱野花沽酒賞新晴只緣
未讀時文熟端台山中且菜羹

次韵諸友遊雲居

又是東風柳絮時催春尙喜杜鵑遲雨晴蔓綠侵高木風
定殘紅閣舊枝眼底好山娛意思耳邊幽鳥話心期雲居
見說郊行樂不得騎驢背錦隨

題西湖竹閣寺

入門纔見萬琅玕便覺玲瓏日影寒峰勢近環簷外立湖

光更好竹中看煙霞古淡僧容瘦風露清高鶴夢殘已占
雨亭涼坐足再須登閣倚欄杆

千古清風白樂天昔時曾此飽談禪自從西閣無吟迹唯
有東坡嗣舊傳來往祇應湖上寺聽聞誤說海中仙我來
再拜祠堂下笑摘巖花薦井泉

余評事惠龍團獸炭香瓔鳧實且許以楮衾而未至
青禽銜雲落蓬壺風檐快讀光眉鬚百朋珍貺羅庭隅一
一皆可當清娛建溪龍焙香雲腴香瓔巧製來東吳鬚髻
獸炭奇形模辟邪天祿獅熊羆王家烏種君家鳧晴沙暖
抱明月珠雅意下照仙人癭矮窓醉兀詩情孤蒲團松拂
燒紅爐蜎廬積凍春潛驅侍兒金珞香玉膚月鐙煮雪煎

春酥腮前笑玩嬌黃雛託言直可貢上都其波及晉皆君
餘獨欠一幅橫雲鋪王孫醉擁紅氍毹楮生長揖非吾徒
藤床紙帳恰此須能供梅花清夢無

新晴曉步

晴曉芳蹊潤幽情得自怡霧黏行草蝶風舞冒花絲竹靜
聞隣話林虛度客基意行無伴侶池上只鶯知

放生池納涼晚歸

湖面輕煙起前山漸不分鐘聲連寺答人語隔船聞吟客
衣生月歸僧笠帶雲及城門未掩燈火已紛紛

唐元齡

元齡新建人寶祐元年進士官樂安令

鬱林寺

一徑通深窈叢林獨蔚然神仙棲佛屋香火當僧田罕見
催租吏誰談文字禪吳儂來拜朔僂指滿三千

華蓋山

巍然獨立九霄中勢壓衡廬亘華嵩擣藥聲高蟾闕近乘
槎路渺鵲橋通三更見日生滄海六月飛霜下翠空好挾
千年王子晉玉笙輕度碧桃風

曾極

極字景建南豐人季狸從孫朱子見其書及詩甚
稱之以詩語忤史彌遠謫道州卒有春陵小雅

紅泉精舍

十里長松一幅巾溫湯淨濯滿衣塵石門隔斷世間事仙
窟能容鶴上人已主謝公爲北道更依華子作西鄰紅泉
可酒兼宜茗便合躬畊老此身

往春陵作

挾策行行訪楚囚也勝流落嶠南州鬢絲半是吳蠶吐襟
血全因蜀鳥流徑窄不妨隨蘭粟路長那更聽鉤輅家山
千里雲千疊十口生離兩地愁

送曾泉州

隱然風節動朝行屢叩龍墀貢皂囊未促相如歸蜀道翻
令汲黯去淮陽使藩自足榮萊服遂殿誰當補舜裳急召
諸賢固根本璽書早晚出明光

和謝康樂華子岡韻

隱仙無定在館宇非一山華子出商洛巢雲俯渴泉
藤顛劉蹶際師生自爲賢頗哀區中人峯頂起新阡
決絕目下事駕鴻凌紫煙身隱焉用文滅跡托空
空雲仍散洲渚世漁業相傳笊箸挂虎落舴艋當
門前蹇予厭世慮企石聽潺湲山空月明時足音
自跼然

遊華子岡紅泉碧澗

去城纔半驛深谷自逶迤藤絡崩厓石松垂倒地
枝寒山束毛髮碧澗照須眉霜氣全消散空存太
傅祠

金陵百詠

選三十九首

覆舟山

六代興亡貉一邱繁華夢逐水東流
操蛇神向山前笑三百年前幾覆舟

秦淮

鑿斷山根役萬人祖龍癡絕更東巡
石城幾度更新主贏得淮流尚繫秦

西浦

珠璫錯落江臯佩羅襪輕盈洛浦妝
欲採蘋花擲春信停桡難覓杜蘭香

桃葉渡

褰腰芳草抱長隄南浦年年怨別離
水送橫波山斂翠一如桃葉渡江時

臙脂井

寒泉玉甃沒春燕石染臙脂潤不枯杏怨桃羞嬌欲墮猶將紅淚灑黃奴

射殿

鶴蓋陰陰覆苑牆更添蒼雪助清涼高皇儉德規模遠不作南朝石步廊

古龍屏風

乘雲遊霧過江東繪事當年笑葉公可恨橫空千丈勢剪裁今入小屏風

新亭

青山四合遶天津風景依然似洛濱江左于今成樂土新

亭垂淚亦無人

賞心亭

柱上題名客姓蘇江山清絕冠吳都六花飛舞凭闌處一
本天生臥雪圖

同泰寺

布薩闌齋涕泗揮大通基在昔人非此身終屬侯丞相誰
辦金錢贖帝歸

宋興寺

晉至呂明祚已終識文猶有兩皆童趙元倫得宮中璽卻
屬新河伐荻翁

八功德水

數斗箕厨替八珍穿松漱石瑩心神中涵百衲煙霞色不染齊梁歌舞塵

謝元廟

兒輩能軍國未危更令朱序助聲威秦人若有全師集雲母車盛晉鼎歸

蔣帝廟

白馬千牛繫廟門爐煙浮動袞龍昏闔棺謾說榮枯定青骨猶當履至尊

吳大帝陵

老瞞虎裂橫中州何物生兒作仲謀四十帝中功第一壞陵無主使人愁

卞將軍墓

握節顏公拳透瓜歸元先軫面如生晉陵發掘今無主獨
有忠魂只冶城

張麗華墓

伴侶聲沈王氣銷香魂血淚有誰招蓬科三尺光塵在猶
作臺城花月妖

臺城

紫蓋橫天整復斜興亡接翅似昏鴉舊時石闕摩雲處荻
屋荆扉一兩家

李氏宮

埋愁無地奈君何可是黃壚飲恨多玉鏡臺前棄脂水深

泉流水尚盈科

華林園

羽葆來臨鼓吹停
華林暢飲倒長瓶
萬年天子瞢騰眼
錯認長星作酒星

昇元閣鐸

摩挲石柱蘚痕斑
亡國如鴻去不還
無復切雲三百尺
祇傳風鐸在人間

孫陵鵝眼錢

六代初終幾變遷
孫陵無樹起寒煙
青蚨細薄如榆莢
猶是當年買笑錢

澄心堂紙

楮生玉面霧深藏未肯橫陳翰墨場一幅降牋何用許價
高緣寫宋文章

德慶堂字

森然筆勢聚干將氣軋鍾王未肯降惆悵當年鉞鉤鎖可
能無意鎖長江

三段石

凜然皇象法書存重屋應無野火焚割據英雄餘一念斷
碑千載尚三分

校官碑

風摧雨剝校官碑集古先生竟不知同是光和不歲刻未
容苦縣獨稱奇

石步道中有石麒麟數十

地悴天荒邱隴平難從野老問衰興蒼烟落日低迷處折足麒麟記壞陵

鳳州柳

蜀主函封遣使時芳根元自鳳州移柔荑醺醖今安在唯有青絲拂地垂

青松路

致君堯舜事何難投老鍾山賦考槃愁殺天津橋上客杜鵑聲裏兩眉攢

天門山

鯨翻鰲負倚江潭天險由來客俗談高屋建瓴無計取二

梁剛把當殺函

西原

衰草寒雲雁一行
牽愁水似九迴腸
游人欲問干官事
翁仲無言臥夕陽

元武湖

當日湖光澈鏡心
龍旗鳳吹此登臨
而今鉄馬廻旋地
斜照黃塵一尺深

清涼寺

秋月春花迹未陳
袞龍曾遶夢中身
夷門金鼓從天落
驚起床頭駟駒人

寶公塔

六帝園陵墮劫灰獨餘靈骨焚崔嵬行人指點雲間鶴喚
得齊梁一夢回

養種園

後主于宮中作紅羅亭賞紅梅韓熙載獻
詞云桃李不須誇爛漫已輸了春風一半

百花堂裏賞芳菲江左羈臣淚濺衣腸斷上林桃李樹春
風一半未全歸

商飈館

卽九月臺也
地產臘脂菊

商飈基在昔人非草木猶爲富貴移曾是六朝歌舞地黃
花一半染臘脂

夢筆驛

晉尙清談筆力衰文章高下亦隨時景純不作文通死五
色毛錐付與誰

射雉場

不整軍容北射狐
邳資媒翳取歡娛
山梁飲啄關何事
浪費君王金僕姑

蜀海棠

傳芳遠遠自西隣
錦傘高張熨眼新
花睡覺來紅淚落
年年如意故宮春

文天祥

天祥初名雲孫字宋瑞一字履善廬陵人寶祐四
年進士第一德祐初除右丞相兼樞密使元兵至
奉使軍前被拘亡入真州泛海至温州益王立拜
右丞相以都督出江西兵敗被執囚燕京四年不

屈死柴市有指南吟嘯諸集

敬和道山堂慶瞻御書韻

墨灑天奎映籀紅斯堂殿閣與俱隆方壺圓嶠神仙宅溫
洛榮河造化工列聖文章千載重諸孫聲氣一時同著庭
更有邦人筆稽首承休學二忠

著作之疑乃胡忠簡
公書周文忠公立

游青原

鐘魚閑日月竹樹老風烟一徑溪聲滿四山天影圓無言
都是趣有想便成緣夢破啼猿雨開元六百年
空庭橫蟠螭斷碣偃龍蛇活火參禪筍真泉透佛茶晚鐘
何處雨春水滿城花夜影燈前客江西七祖家

南華山

北行近千里，廻復迷西東。行行望南華，忽忽如夢中。佛化知幾塵，患乃與吾同。有形終歸滅，不滅惟真空。笑看曹溪水，門前坐春風。

金陵驛

草舍離宮轉夕暉，孤雲飄泊復何依。山河風景元無異，城郭人民半已非。滿地蘆花和我老，舊家燕子傍誰飛。從今別卻江南日，化作啼鵲帶血歸。

遇異人指示作五言八句

誰知真患難，悟此大光明。雲散天仍在，風休水自清。功名幾滅性，忠孝太勞生。此意如能會，神仙亦可成。

上元懷舊

禁門三五金吾夜回首青春忽二毛池上昔陪王母宴斗
中今直貴人牢風生江海龍游遠月滿關山鶴唳高夢到
釣天燈火闌依然彩筆照宮袍

理宗度宗

先帝弓劒遠永懷侍芳茵今朝漢社稷爲話涕霑巾

誤國權臣

蒼生倚大臣北風破南極開邊一何多至死難塞責

京城

當宁陷玉座兩宮棄紫微北城悲笳發失涕萬人揮

陵寢

五陵花滿眼霜露在草根冥冥子規叫重是古帝魂

邳州哭母小祥

我有母聖善鸞飛星一周去年哭海上今年哭邳州遙想
仲季間木主布筵几我躬已不閱祀事付支子使我早淪
落如此終天何及今畢親喪于分亦已多母嘗教我忠我
不違母志及泉會相見鬼神共懽喜

過淮

北征垂半年依依只南土今辰渡淮河始覺非故宇故鄉
已無家三年一羈旅龍朔在何方乃我妻子所昔也無奈
何忽已置念慮今行日云近使我淚如雨我爲綱常謀有
身不得顧妻兮莫望夫子兮莫望父天長與地久此恨極
千古來生業緣在骨肉當如故

亂離歌六首

有妻有妻出糟糠自少結髮不下堂亂離中道逢虎狼鳳
飛翩翩失其凰將雛二三去何方何處國破家又亡不忍
舍君羅襦裳天長地久遠茫茫牛女夜夜遙相望嗚呼一
歌兮歌正長悲風北來起彷徨

有妹有妹家流離良人去後攜諸兒北風吹沙塞草萋窮
媛慘淡將安歸去年哭母南海湄三男一女同歔歔惟汝
不在割我肌汝家零落母不知母知豈有瞑目時嗚呼再
歌兮歌孔悲鵲鵲在原我何爲

有女有女婉清揚大者學帖臨鍾王小者讀字聲琅琅朔
風吹衣白日黃一雙素璧委道旁雁兒雁兒秋無梁隨母

此去誰人將嗚呼三歌兮歌愈傷非爲兒女淚淋浪

有子有子風骨殊釋氏抱送徐卿雛四月八日摩尼珠榴
花犀錢落繡襦蘭湯百沸香似酥欵隨飛藿飄泥塗汝兄
十三騎鯨魚汝今三歲知在無嗚呼四歌兮歌以吁燈前
老影明月孤

有妾有妾今何如大者手將玉蟾蜍次者親抱汗血駒晨
妝靚服臨西湖英英雁蕩飄瑤琚風花亂墜鳥嗚呼金鏡
沉瀝浮汙渠天摧地裂龍虎徂美人塵土何代無五歌兮
歌鬱紆爲爾迎風立斯須

我生我生何不辰孤根不識桃李春天寒日短空愁人北
風吹隨鐵馬塵初憐骨肉鍾奇禍如今骨肉更憐我汝在

空能嬰我懷我死誰當收我骸人生百年何醜好黃梁得

喪俱草草嗚呼六歌兮勿復道出門一笑天地老

收柳女信滿河

腸胃人誰無妻兒骨肉之情但今日事到這裏于議當死

乃是命也奈何奈何塗中有三詩今錄致言至于此淚下

如雨一讀此三詩便知老兄悲痛真切之情事至于此

爲之奈何兄事祇待千二哥至造物自有安排一可將

此詩呈嫂氏歸之天命仍語靚妝瑤英不會周旋得毋怨

母怨徐姝以下皆可道達吾此意當此天翻地亂人人流

落天數奈何奈何一可令柳女環女好做人爹爹管不

得淚下哽咽哽咽一此詩本仍可納之于二哥兄天

祥家書達百五賢妹

贈祕書王監丞

君不見祕書外監賀放翁鏡湖一曲高淸風又不見太子

師傅兩疏氏東門祖帳羅羣公人生晚節良不易顏波直

下誰障東使人知有在我者二三君子爲有功我公金華

山下住赤松安期白雲處風骨細瘦真神仙急流勇退不
背顧我昔山中想風采幾回擊節歸田疏適來追陪水蒼
佩親見辭歸白雲路御筆擢公領蓬山師表玉立東宮官
兩年苦口一去字未許鷗鷺從公閒瑤池深深鎖策府玉
皇宮闕僑其間暫分赤府管下界半空雲氣常往會多少
持麾辭上國悠悠風塵見此客莫作尋常太守看疏賀以
來偉人物夜瞻婺女次舍中一點光明射南極公歸眠食
重調護世道尙憑公氣力

間居和雲屋道士

一樽聊共此時心文字追隨落醉吟仙子樓臺修竹外行
人遙望畫橋陰一年芳草東風老五月空江夜雨深且作

蘭亭歡喜集更論誰後又誰今

龍霧洲覺海寺次李聞溪壁間韻

闍黎鐘後訪圓蒲江色漫漫晝欲晡一笛梅邊何滿子千
簑蘆外筆頭奴急風吹雁還家未新雨生濤到海無本是
白鷗隨浩蕩野田漂泊不爲孤

山中謾成柬劉方齊

東風解凍出行嬉一閑煙塵隔翠微自有溪山真樂地從
來富貴是危機二三輩行惟須醉多少公卿未得歸明日
主人酬一座小船旋網鰕魚肥

別謝愛山

君今拂衣去我獨枕書眠一片過林雨數聲當戶蟬情長

空有恨吟苦不成篇後會知何日西風老雁天

病中作

病裏心如故間中事更生睡猶隨我嬾黠鼠向人鳴羽扇
看碁坐黃冠扶杖行燈前翻自喜瘦得此詩清

驟雨知何處一溪秋水生苦吟肩鶴瘦多病耳蟬鳴隱几
惟便睡挑包正倦行山深明月夜乞我半窗清

寄興逃吾病吟詩老此生風高鴻雁起晴久鴉鳩鳴野樹
辭秋落溪雲帶雨行晚涼便懶坐移傍竹陰清

曉起

遠寺鳴金鐺疎窓試寶熏秋聲江一片曙影月三分倦鶴
行黃葉癡猿坐白雲道人無一事抱膝看回文

夜坐

淡烟楓葉路細雨蓼花時宿雁半江畫寒蛩四壁詩少年
成老大吾道付逶遲終有初心在聞鷄坐欲馳

題楚觀樓

西風吹感慨曉氣薄登臨半壁楚雲立一川湘雨深乾坤
橫笛影江海倚樓心遺恨飛鴻外南來訪遠音

某叨臬衡湘蒙恩以便郡歸養肯齋大卿實寓衡我
十年前邦君也一再見問卽分南北五言啟之所以
致今舊雨繾綣云

瀟湘一夜雨湖海十年雲相見皆成老重逢便作分啼鵲
春浩蕩回雁曉殷勤江濶人方健月明思對君

幕客載酒舟中卽席序別

故人滿江海遊子下瀟湘
夢載月千里意行雲一方
櫓聲人語小岸影客心長
總是浮萍迹飛花莫近檣

將母赴贛道西昌

重來鷗閣曉帆影漲新晴
倚檻雲來去開簾花送迎
江湖春汗漫歲月老崢嶸
手把忘憂草蘼蘼繞太清

翠玉樓晚雨

晚樓一曲轉梅花官事無多報
放衙林木蔽虧煙斷續江
流曲折雨橫斜年華冉冉風
前影歲暮悠悠客裏家一雁
近從沙觜落更饒片雪入天涯

翠玉樓

昏鴉何處落野渡少人行黃葉聲在地青山影入城江湖
行客夢風雨故鄉情試問南來信梅花三兩英

皂蓋樓

一水樓臺繞半空圖畫開蝸涎行薜荔雀影上莓苔碧落
人千載青山酒一杯晚烟看不盡待月却歸來

雲端

半空夭矯起層臺傳道劉安車馬來山上自晴山下雨倚
闌平立看風雷

改題萬安縣凝祥觀

古道松花空翠香風前鬢影照滄浪飛泉半壁朝雲濕啼
鳥滿山春日長須信神仙元有國不知蠻觸是何鄉道人

橫笛招歸鶴坐到斜暉上壁璫

山中再次胡德昭韻

不將顏色污黃金落得灞橋驢上吟是處江山生酒興滿
天風雪得梅心觥籌堂裏春聲沸燈火林臯夜色深人世
可能行樂爾重遊不用卜晴陰

人生柳絮關堅牢過眼春光歎伯勞蜀道謾傳千古險廬
山方許一人高眼前見赤徒妨道耳後生風未當豪明月
蘆花隨處有扁舟自在不須篙

曾見尊前此客哉笑攜麈尾拂莓苔水邊飛雁年年見湖
上新亭日日來酹菊醉餘披草坐探梅吟罷帶花回北厓
尚被剛風隔笑殺匆匆上馬杯

送人往湖南

雁拖秋月洞庭邊
客路淒涼野菊天
雲隔酒尊橫北海
風吹詩史落西川
夜深鬼火千山雪
春後鵲花一樹烟
爲我祝融峯上望
朝曦白處禮蓬仙

馬祖巖

會將飛錫破苔痕
一片雲根鎖洞門
山外人家山下路
石頭心事付無言

禪關

秋風吹日上禪關
路入松花第一灣
只願四時煙霧少
滿城樓閣見青山

塵外亭

半山風雨截江城未脫人間總是塵中夜起看衣上月青
天如水露華新

西昌倪氏有山谷書杜陵山水圖障歌作江山堂堂
廢其後人以黃書求題跋感慨一絕

杜二已亡黃九去長歌大字落江山百年風物今何似春
水晚烟飛白鵬

題元潭觀雪浪閣用誠齋韵

棄官學道句山許學到至人本無怒赤子鱗鱗如魚頭不
堪妖孽腥上流鉗鍵長潭鐵樹立摩訶穹石竇劍濕當時
豈忍如是觀毒流不可開眼看英風凜凜萬古寒

發吉州

已卯六月初一日暮然亭下楚囚立山湖顛倒紛雨泣乙
亥七夕此何夕煌煌斗牛劍光濕戈鋌雪雷電擊三百
年來火爲德須臾風雨天地黑皇綱解紐地維圻妾婦偷
生自爲賊英雄扼腕怒鬚赤貫日血忠死窮北首陽風流
落南國正氣未亡人未息青原萬丈光赫赫大江東去日
夜白

送鄧中甫

秋氣晚生烈客衣早知寒把衣不能別更盡此日懽出門
一萬里風沙浩漫漫豈無兒女情爲君思沈瀾百年有時
盡千載無餘歡明明君臣義公獨爲其難願持丹一寸寫
入青瑯玕會有撫卷人孤燈起長歎

神龍蕩失水馴擾終未得威鳳雖在藪豈願鷄鶩食所以
古之人處變心不易毫都已遷周西山竟餓瘠豫子身自
漆萋宏血成碧何嘗怨興廢而或二三跡堅白不可緇
裘良自惜此義公素明俗見或未識

嗟予抱區區疇昔同里閭過從三十年知心不知面零落
勿重逢家亡市朝變惻惻蹈海餘踽踽南冠殿劇談泥塗
際握手鞍馬倦依依斯文意苦恨十年晚魯仲偶不逢隨
世本非願靈胥目未抉端欲請所見及茲萬里別一夕腸
百轉余生諒須臾孤感橫八縣庶幾太尉事萬一中丞傳

和曹倅賦別

名大發
韻倅

翠松三萬頃松雪著神仙柳院催金鑰江花送玉鞭
曉

雲壁立晚棹浪規圓未了醉翁事重尋頻上田

文天祐

天祐廬陵人天祥弟從義軍中天祥被執遂死之

按王炎午吾汶集載文丞相兄壁官惠州以城降
茲掘廬陵志內本湖廣流寓志丞相兄天祐官教諭
宋亡不仕弟天祐赴義死一說收入

黃山聽琴

歲晏抱琴入室處梧樞燒殘聽風雨有客五弦彈太古埽
空恩怨不兒女汗樽杯飲擊土鼓如與羲軒相對語又如
重華坐舜臯萬物長養不苦窳聞君澹然太古音感君悠
悠太古心古意古意誰能識古人古人何處尋

謝枋得

枋得字君直號疊山弋陽人寶祐四年進士景炎
時爲江東制置使卽弋陽起義兵軍潰隱于閩元
徵聘累辭不就後福建行省魏天祐迫脅至燕不
食死門人誄之曰文節先生有疊山集

求紙衾

避世知無地危身只信天寧持龔勝扇不著挺之綿養性
真同道知心有宿緣紙衾加惠絮晴日臥雲邊

春日聞杜宇

杜鵑日日勸人歸一片歸心誰得知望帝有神如可問謂
予何日是歸期

慶全巷桃花

尋得桃源好，避秦桃紅。又見一年春花飛，莫遣隨流水。怕有漁郎來問津。

武夷山中

十年無夢得還家，獨立青峯野水涯。天地寂寥山雨歇，幾生修得到梅花。

菖蒲歌

有石奇峭天琢成，有草天天冬夏青。人言菖蒲非一種，上品九節通仙靈。異根不帶塵埃氣，孤操愛結泉石盟。明窓淨几有宿契，花林草砌無交情。夜深不嫌清露重，晨光疑有白雲生。嬾如秦時童女登蓬瀛，手攜綠玉杖徐行。瘦如天台山上聖賢僧，休糧絕粒孤鶴形。動如五百義士從田

橫英氣凜凜摩青冥清如三千弟子立孔庭回琴點瑟天
機鳴堂前不入紅粉意席上常聽詩書聲怪石篠簜皆充
貢此物舜廟當其登神農多智入本草靈均蔽賢遺騷經
幽人耽翫發仙興方士服餌延修齡綠鸞紫鳳琪花苑青
蚪玉麟芙蓉城上界真人好清淨見此靈苗當大驚我欲
攜之朝上帝太清瑤草不敢專芳馨玉皇一笑留香案賜
與有道者長生人間千花萬草盡榮豔未必敢與此草爭
高明

謝劉純父惠布

嘉樹種木綿天何厚八閩厥土不宜桑蠶事殊艱辛木綿
收千株八口不憂貧江東得此種亦可致富殷奈何來瘴

癘或者畏蒼旻吾知饒信間蠶月如岐邠兒童皆衣帛豈
但奉老親婦女賤羅綺賣絲買金銀角齒不兼與天道斯
平均所以木綿利不畀江東人避秦衣木葉矧肯差懸鶉
天下行元德孔融願卜隣綈袍望不及其裘心自仁贈我
以兩端物意皆可珍潔白如雪積麗密過綿純羔縫不足
貴狐腋難擬倫絺纈皆作貢此物不薦陳豈非神禹意隱
匿遺小民詩多草木名箋疏徒諄諄國家無楚越欲識固
無因剪裁爲大裘窮冬勝三春拜嘉重感激觸物尤酸辛
吁嗟彼寒谷鄒律今不神三宮坐窮廬雨雪或十旬安得
移此惠飛到君王身塞上寒墮指挾纈誰爲溫人各賜兩
端費銀貳萬斤大軍四十萬談笑掃煙塵感君道義交何

異骨肉親可與知者道衆人笑且嗔玉案未能報瓊琚情
則真春秋二百年幣交幾君臣季札有贈好千載尙如新
贈相士吳楚峯

世亂異人出高者爲神仙方術皆救世可知愚與賢喜君
風鑑別妙處不可傳著眼看福人要識太平年

乞醯

平生忍酸寒鼻吸醋三斗先民恥乞字乞醯良可醜賣鷄
買魚烹鷄魚誰舍取將爲水晶鱠聊悅苦吟口主人曰無
醯調和只宜酒一夜嚴霜寒池冰堅可扣雖知酒不冰流
漸魚可走旁觀粲然笑易牙知此否始知五味和鹹酸必
相有提壺我有求君甕肯發剖宿諾惠未來望梅渴已久

似陶君醺醺巧心出楊柳楊柳屬他人腸斷香山叟舉瓢
酌醺時又憶玉纖手一顧一心酸淚珠滿翠袖此亦人至
情何不告朋友古人有乞漿得酒意愈厚又恐酒俱無太
歲正在酉

魏參政執拘投北行有期死有日詩別妻子及良友
雪中松柏愈青青扶直綱常在此行天下久無龔勝潔人
間何獨伯夷清義高便覺生堪捨禮重方知死甚輕南八
男兒終不屈皇天上帝眼分明

白况

手撚琪花吹玉簫至人長與道逍遙黃雲白鶴無拘束聞
看吳兒弄晚潮

贈畫梅吳雪塢

吳君雪塢善畫梅竹胸次爽豁所交多賢人梅竹其所好雪塢其所居穹壤間如有五更風雪夜當門獨立人必能知吳君之不凡矣廣信謝枋得贈之詩曰

冷凝寒極雪漫漫天下無人知袁安起來門前問梅竹吾友可以話歲寒歲寒心腸如鐵石不與萬物同摧殘有時醉中畫梅竹洪釣只在掌握間人生莫與天爭巧上帝一見開笑顏八極俗物不足道千年陳人無可觀誰人能奈此雪過春風去後終須還千紅萬紫爭爛漫梅竹攜手隱空山皐陶庭堅不祀苦程嬰杵臼存孤難豈無當門獨立

者五更風雪不相干上帝慈仁須動念醒來紅日上三竿

謝黃禪師華嚴會供食

十兆九萬拜求道心如惔毘盧頂上珠直欲一手探天厨
送佳饌衆腹豈敢貪君有維摩心作蘭憐吳蠶八萬四千
供只須丈室函昔我聞晨鐘今載草堂柑流年急如梭長
壽愧仙藍勇尋趙州關何畏白髮鬢願爲護法輪金甲持
長鎗又恐回道入晚遇黃龍南

崇真院絕粒偶書付兒熙之定之并呈張蒼峯劉洞
齋華甫

西漢有臣龔勝卒閉口不食十四日我今半月忍渴饑求
死不死更無術精神常與天往來不知飲食爲何物若非

功行積未成便是業債償未畢太清羣仙宴會多鳳簫龍
笛鳴瑤瑟豈無道兄相提攜騎龍直上寥天一

贈何古梅學醫

永州何仙藥最靈神丸能潰邕州城廣西兩道載清平百
萬赤子何更生笙鶴一去二百年東南忽變爲腥羶爲血
爲肉生靈苦在者瘡痍何日塗上界真人有同性不學神
仙學孔孟有術醫國無人知要爲吾民救微命察衄肥瘠
韓子精論疾陰陽子庭明神功端不讓恩邈古道依然如
宋清得錢賣藥少取利無錢乞藥喜捨施好客來時入酒
壚無朋終日閱書市憶昔民生三皇前下壽無疾享百年
神人妙用不可見本堂靈素猶有傳古云醫不通三書世

上斷不服其藥如君胸中有炎黃冷笑三書盡糟粕我聞
上帝最好生活人功多朝玉京請看耆叟至陶葛神仙多
是良醫成東南干戈二十秋人無貧富眉長愁千人幸有
一人在兩處呻吟無歌謳遺黎若要家平康但願良醫自
天降不邇手藥有靈時好看良醫作良相

謝惠藥

雪深不能鑊黃精天寒不能斷茯苓瑤草共食何日長還
丹獨煉何時成如來憐我似鶴形指揮龍樹露神靈佛無
老死無生滅何用勞我以長生

送子高歸延平

亂世讀書少前人教子難青燈長合席紅葉趨歸鞍梅自

知春近松應耐歲寒樓高新月好後夜與誰看

和靖可韻

孟韓相慕久懸懸恨不論詩早十年吾道不行知有命斯
文將喪更由天此生何恨爲龔勝來世誰能知仲連不信
無人扶宇宙是邦豪傑已潛然

和道士陳天隱

學道無魔道不成神人得計是無名光風自覺長瀟灑明
月何曾有死生早悟海山難養性何如福地別尋盟梅花
香裏堪聯句莫笑人間石鼎鳴

示兒

門戶興衰不自由樂天知命我無憂大兒安得孔文舉生

子何如孫仲謀天上麒麟元有數人間豚犬不須愁養兒
不教父之過莫視詩書如寇讐

千古興亡我自知一家消息又何疑古來聖哲少才子世
亂英雄多義兒靖節少陵能自解孔明王猛使人思只虞
錯改金根字焉用城南勸學詩

代贈張經歷

中原自古生豪傑晉國尤多賢大夫學問斷無虛議論功
名須有大規模臂間弓矢真良將舌底詩書笑腐儒自恨
兩賢相識晚不妨杯酒恣歌呼

題東觀壁

觀外好看船往回觀中幾度見桃開常瞻紫氣青牛去又

帶白雲黃鶴來天地無情搔短髮古今多變付殘杯醉中
尙有醒時眼不信玉山人可推

老樹猶能識道回好懷清對碧天開青山綠水何人管明
月清風要我來少日曾聞黃石教平生幾擲左慈栢道兄
慣見人間事快抱棋枰信手推

蠶娘吟

子規啼徹四更時起視蠶稠怕葉稀不信樓頭楊柳月玉
人歌舞未曾歸

謝雨

雨字君澤弋陽人枋得弟有文名嘗題詩湖上賈
似道疑其譏已陰使人害之君澤覺急投身呂師

夢獲免

題湖上

杜鵑呼我我歸休
陸有輕車水有舟
笑殺西湖湖上客
醉生夢死戀杭州

江西詩徵卷二十一

江西詩徵卷二十二

宋

羅椅

椅字子遠號礪谷廬陵人饒雙峯門人與文節國
友善寶祐四年進士以秉義郎爲江陵教授改潭州
及宰贛之信豐遷京權請逐賈似道遂劾歸饒州
陷憂憤不食卒有礪谷集

吳江雪霽圖

天上清流雪片人間名勝吳淞兩賢相厄已甚賴得斜陽
半峯

次劉孟元見贄韻

坐久不知夜飢鼯窺瓦檠詩徒吟樂國酒不打愁城白雪
夫君句黃花老我情商量能住否賸欲飲公榮

寄危驪塘贈以古鑑

百尺樓頭山雨長夢提白髮濯滄浪從渠金帶花成簇何
處魚羹飯不香語妙囊中了今古騷成肘後繫瀟湘山寒
歲晚蘭苗盛欲當包茅獻草堂

幼興折齒歌

秋衫未成錦機語棠梨半花鳳一羽象牀雪綜小龍梭細
穴銀光口冰縷西鄰郎君東海歸芙蓉半白杏雨肥十二
闌邊說幽怨勸織南浦鴛鴦飛匿蘭含蕙無消息春醒形

霞漾玉色小龍呼出風雨聲奔騰觸裂雙白石白石國城
三十六女子軍來兩城覆鸞歌猿嘯強激昂百戶風來如
箭鏃章臺公子真豪縱復以微言相感動郎君切莫更癡
心忍作甘心可人痛

冷泉亭

老木碧粼粼幽亭著雨三山飛不到地空處遂爲巖古塔
開蒼蘚清泉滴暮嵐遊人莫來此渠正試春衫

謝南劍黃使君贈松紋劍

使君袖裏玉淵虬曾截蠻江江上流海立山搖三尺外風
育雨怪一時休民元不許佩牛犢客政何妨彈蒺藜遮莫
塵清使回使青山猶赦郅支頭

白蓮花

白鸞仙人按羽衣曲中弄影江南漪江如閉置未許歸一
把青寒縈玉絲玉絲蟬連不禁折折著透根仍透葉風流
極處絕成愁君不見秋扇團圓似明月

江石

勢橫截江虎踞足白龜斜行馮夷哭大川當前波沄沄石
也如此受命獨水石擊撞無了時因危見節乃見奇世間
大有胡廣輩欠讀澗民江石詩

溪南春曉

行逢二三月春映掌中盃綠久山猶淺花寒雨未開誰能
奈愁得判不上樓來更莫看雲坐瀟湘有鴈回

寄答楷姪

時秋四壁冷片紙百回看字古微侵熱吟清不到寒人生
快意有天下好詩難澗水光如月吾琴爾去彈

題圓覺寺小軒

禪子安排定不癡數拳石映半泓池巖如大石元生就水
似人心未動時二月春深梅不覺五更風起檜先知青林
野寺西湖路直得先生一首詩

遠遊

因夢吳雲賦遠遊江花扶柁水悠悠半輪月散千山影一
葉舟勝萬斛愁天氣漸於寒食近春風只到牡丹休水程
孤冷難爲夜起吸滄江當拍浮

鄧林

林字楚材一字性之號四清社友新淦人寶祐四

年進士有皇琴山

按通志選舉內鄧林臨江新淦人寶祐四年進士又景定二年

進士有兩鄧林一崇仁人一南城人今據南宋羣賢集作臨江人者收入

玉兒

金蓮華上俞尼子永壽神仙羅繡綺苑中荆棘布令嚴玉
像支離瓦官寺六宮鵬翻起淫風太白便應縣姐已此身
肯許樊籠夫猛爲東昏判一死到今羞殺賣降人去作練
兒梁姓臣

朱彥和

文如玉海動時流曾以書某伏隱侯武德閣前消幾語卻

令梁氏缺金甌

任蠻奴

千里旌旗已渡江
蠻奴苦諫喚蕭郎
卻持官裏黃金去
整拜韓擒石子岡

石崇

梓澤神仙第一居
爭豪不惜碎珊瑚
荆州使客知何罪
未必亡身爲綠珠

送衡山琴畫張道士

滿天風月澹蕭騷
三尺孤桐古調高
不敢問君聽別操
請彈二十五離騷

滿空煙雨澹模糊
三尺霜嫌老墨枯
不敢問君求別景
請

描七十二峯圖

南國有佳人

南國有佳人仙姿自蓬島
龍綃照明璫鳳釵橫貴寶
新妝試鸞鏡皎皎顏色好
芳年條已笄君子可偕老
奈何行媒弱修言弃中道
洞房闇怱悵琦璫結組綯
寧作鍾離春勿學姑瑤草

劉阮

鹿車小宇宙據鞍常醉眠
風塵瀕洞時杯裏全其天
伶達故自佳籍放乃無用
試看勸進表何似酒德頌

江湖偉觀

世間無盡是天游更出吳山最上頭
江面春聲潮趁雪湖

心寒影月澄秋海門丹楫雲間見瀛嶼亭臺水際浮不比
錢塘歌舞處遠懷西北有神州

桂村

翦翦霜風起晚吹一溪流水浸寒暉客衫猶恨吳絛薄不
道邊人盡鐵衣

過綠野

世上今無隱退風地名偶與午橋同往來怕看銅駝陌閒
倚柴門憶管公

西湖

高價租船作勝游窮逋敢鬪風流西湖多少閒春水不
洗中原二百州

贛州上清道院呈姚雪篷

短牆不礙遠山青
無事燒香讀道經
時把一杯非好飲
客懷宜醉不宜醒

綠陰亭自唐時有之
到今五百年
盧肇二三公題詩
之後吟聲寂寂久矣
亭前古木不存
綠陰之名殆成
虛設
今詩人李賈友山作尉於此
實居此亭
公事之暇
與江山風景相應
接境因人勝
見於吟筆多矣
友人石屏戴復古訪之
相與周旋於亭上
題二絕句以
記曾來

慘慘秋風吹客襟
唐人遺跡宋人吟
浮雲世事多遭變
不獨此亭無綠陰

千山橫碧一溪清白鳥飛邊落照明吏散庭堦無一事綠
陰亭上又詩成

吳琳

琳字禹玉號存吾臨川人潛子寶祐四年進士倅
婺州

題鹿田西寺壁

爲從吏隱招提宿相望城中隔幾塵雲暗雨來疑是晚山
深寒在不知春鋤松得石添幽徑接竹通泉有近隣此去
又尋三洞約初平應怪我來頻

鄭蕚

蕚貴溪人寶祐四年進士

江西詩徵

卷二十一

宋十八

六

早春山行

山舍雨餘好溪深萬竹齊客同春日出鳥向谷風啼澹泊
雲無着崎嶇路欲迷由來能力疾歸踏夕陽低

鄧夢杰

夢杰南城人

麝梅山壁閣韻

媿我身名墮禍冠無因安得到仙壇子真雖隱名難隱萬
古高風凜凜寒

趙蕃

蕃字昌父一字伯昌號章泉先世鄭州人曾祖暘
官信州因家玉山以恩補官終直秘閣始受學於

劉清之年五十從朱子遊學者稱章泉先生有乾
道淳熙章泉諸集

和淵明貧士詩

故鄉墮渺茫迺此窮山依力業困乏資蕭颯如秋暉人生
初無根歲月著翼飛更堪幾寒暑蔓草真同歸興懷死後
名不補身前飢已矣勿多譚寧能置深悲

誰云鍾期死伯牙遂忘琴淵明出晉宋東坡作知音究其
出處問蛆蟻皆直尋和詩固亾恙端若一手斟我時誦其
集危坐常加欽緬懷兩先生千古同此心

謁文叔于松谷

雞鳴戒柴車月落到林寺先生方睡美童子驚客至晨霜

祭屋瓦初日照平地雖非贊公宿似是超師詣分攜屬秋
風倏忽竟此歲相望不爲遠數見良不易公行立朝班我
政親農耜自茲出處殊寧使心迹異歡華一朝寵風節干
古事要令松谷名因公表於世

寄懷在伯

沅水與湘水合流俱洞庭如何君於我迺隔影與形滄江
鷗鷺靜深秋蘭蕙馨含章斯發發逐性遂冥冥
我苦千里役兒荒三月書役苦殆委頓書荒厯墾鋤夜雨
倒湖水春耕競田廬事貴在勇決爾胡但居諸
倏爾聽鳴鳩慨然悲衆芳春事且衰歇吾行可相羊問年
踰不惑嚶嚶斯謂狂益矣多聞友從之道阻長

成父送梅一株

無竹恐人俗無梅憂竹孤
阿連解我意爲致三尺株
時之西窗前青白相與扶
梅瘦竹亦瘠豈惟人獨癯
終年厄貧病藉爾得暫愉
索酒莫計璣瓶罄當續沽

晚題

浮雲晚陸離巨浪朝澎湃
櫓搖雖甚亟岸遠不可屆
巴邱兩日中湖路千里外
月上照遙山修眉雨新畫

水淺

歲暮百日晴江水三尺淺
褰裳步可涉石子大如爾
沙乾蒲葢死穴遶魚龍偃
會看桃浪來一碧千里遠

次韻元衡送別

老馬千里志老鶴萬里心武夫用清廟珍材卧中林進寸
輒退尺枉尺寧直尋桃李本無言山水乃有音靡不競盛
麗時能聽幽深平生文字游幾化南北襟清宵寄明月遠
望傷遙岑悠悠歸計晚卒卒年事侵狗監薦相如將軍知
杜欽彼哉竟何處已矣真難任乖離每歎昔邂逅豈期今
贈別枉古調和之徒苦吟我何一錢直君自抵千金

和淵明九日閒居詩

有序

重九纔四日爾風雨如此病卧殊無聊小兒輩取
酒飲予且索作詩彊和是什

久不觀陶詩彷彿如前生忽此迫重九意是渠所名我方
卧病中齋居意昏明不知簷雨落但覺奔濤聲雨兒絕可

憐弱者纔五齡深惜乃翁憊取酒前爲傾歲月已如許我
衰難復榮但願此可安閭里無異情何必議徙居於焉計
將成

期斯遠不至登谿亭有懷併屬雲臺劉先生

落日照谿谷寒光搖樹林宿鳥投密枝歸雲釋遙岑餘輝
尚燠背纖月忽在襟可人期不來何以寫我心近者且若
此悠悠望西南

西南定何方路遠惟迢迢白鷺帶演迤青原鬱岵巖下有
隱君子內盛外不驕芳春覺蘭馨窮冬知木喬無爲事獨
往車乘方翹翹

南風行十八日早作

吾聞黃帝張樂洞庭野始意莊生言放假又聞湘靈鼓瑟
進元螭亦意屈子夸厥詞屬行洞庭四月半南風三日吹
不斷黃昏猶是天陸離午夜忽成雲片段病中數起不知
睡側耳篷窗還熟視恍疑帝樂尚鏗鐃又訝湘弦發幽閤
乃知二子元非虛吾聞自用耳目拘須臾月落天向曉依
舊南風波浩渺

遊山谷寺贈住山欽老欽嗣愚邱詩

少小已誦山谷文老大始遊山谷寺按詩尋境盡可得落
筆不容追一字舊聞是老詩有宗韓門更許愚邱雄風流
前輩日已遠此事此山俱屬公

雨中與公擇對飲大醉旣醒作此

身世一飄搖，
愁兩寂寥。
怨歌空耿耿，
晚雨況瀟瀟。
飲強真能醉，
詩成或當謠。
明朝對青鏡，
鬢恐十分凋。

放舟始作

扁舟落吾手，
遠役愴人心。
道路經過數秋風，
日夜深青林。
向搖落白髮，
益侵尋。
況說瀟湘去，
仍懷屈賈吟。

送李袁州汎舟入浙

晦菴無處著，
泛宅又吳淞。
載月初尋棹，
看山不藉筇。
聽渠猿鶴怨，
心喜鷺鷥逢。
遙想題詩處，
楓橋半夜鐘。

送王子尊赴衡陽丞

王郎妙人物，
獨步向江東。
昔尉旣不醉，
今丞寧肯聾。
相依脣齒國，
忽去馬牛風。
清絕官曹外，
何年著我同。

冲谷過予晏齋

夢裏春歸去榴花曉欲然
窻晴書味熟竹密鳥聲圓
多病妨搜句逢人懶問禪
澹然無可語危坐了鑪烟

枕上有感

雪月有餘照風燈無停光
客夢一何短鄉關一何長
拊身念艱虞失足增徬徨
平明攬清鏡鬢髮應蒼蒼

社日風雨

坎坎連村鼓喈喈隔墅鷄
雲低天欲夜雨合路平谿
酒爲治羣飲詩因排悶題
休嗟方杖屨聊取便鉏犁

豐城送成父弟還玉山

溪上同舟送江頭獨步歸
秋風方落木客路要添衣
故舊

詢安否形容話瘠肥吾行猶許遠爾去復誰依

東菴上方

地瘠不宜竹山寒多種松路窮千折險菴在最高峯石溜通泉乳晴簷喧蜜蜂客來僧不語日暮自鳴鐘

章塢庵

路盡庵才出雲深山更藏陂池漸得水松檜舊成行午供隨齋鉢留題陟上方林鳩方喚雨歸路恐相妨

艤舟楊口叩居人以何時縛屋于此云我乃鴈泊人
戶冬來春乃去耳

戶戶魚蠻子年年鴈泊人生資持網罟遷徙逐冬春岸俗從渠變鄉鄰自我親殊勝倦遊者渺渺愧風塵

再見晦庵既行有懷

已別重成見重來那得長順流聽瀟瀟冷日對荒荒既歷
冰霜至還憂雨露雱去留俱有念搔首漫彷徨

發岳州

獄事主人繫使臣王命將移官乏童馬泛宅恃舟航浩浩
沅湘疾滔滔孟夏長妻孥累微祿盜賊幸空囊水驛纔容
借風帆又趣張誰與可尤怨政爾賦行藏

挽趙丞相汝愚

五王不解去三思石顯端能殺望之未到浯溪讀唐頌已
留衡嶽伴湘纍生前免見焚書禍死後重刊黨籍碑滿地
蒺藜誰敢哭漫留楚些作哀辭

至邑有感

朱絃昔日破歌聲歲月頻更感
易生惟有錦江橋下水相逢不改舊時清

自桃川至辰州絕句

明月山前明月池兩崖壁立類磨治
涪溪未識應相似好刻中興第二碑

雨墮初看珠顆圓風來忽散縠絲牽
青山四合江如瀉憶著桐江江上船

悶坐

天氣欲陰還欲晴病多愁絕兩關情
梅花已是飄零盡底事春風恨未平

十一月五日晨起書呈葉德璋司法

卧聞落葉疑飄雨起對空庭蓋卷風正自摧頽同病鶴況
堪吟諷類寒蟲忽思有客渾如我却念題詩不似公已分
藿鹽終白首可因霜雪愧青銅

晚晴

殘風落日蟬亂鳴細履小園欣晚晴投林倦鳥分暝色滿
地落葉無秋聲衛尉一錢曾不直阮郎幾屐畢平生三十
六中第一策脫却世故甘傭耕

絕句

紅葉連村雨黃花獨徑秋詩窮真到骨酒薄不禁愁

哭蔡西山

鵲叫春林復遞詩雁回霜月忽傳悲蘭枯蕙死迷三楚雨
暗雲昏礙九疑早歲力辭公府檄暮年名與黨人碑嗚呼
季子延陵墓不待鑱辭行可知

韓 澆

澆字仲止號澗泉上饒人元吉子與趙章泉同有
詩名方回詩上饒有二泉是也有澗泉日記澗泉

集

按通志作韓澆
今從四庫書

夏夜翫月

夜氣生微涼山空步明月飛光入人家流影到林樾零零
白露滴冉冉清思發乘雲度剛風天上有宮闕

齋居湖寺晚對南屏疎鐘茂林霧氣翳然

南山起寒霧雨氣翳林木但覺白漫漫不見山下木須臾
逼昏黑疎鐘度幽谷寺冷西湖秋齋房媚幽獨

訪南岩一滴泉

僧逃寺已摧唯餘舊堂殿顛倒但土木髣髴昔所見山寒
少陽磔崖冷盡冰線曾無五六年驟覺荒涼變遺基尚可
登一滴泉自濺憶昨淳熙秋諸老所閒燕晦庵持節歸行
李自畿甸來訪吾翁廬翁出成飲餞因約徐衡仲西風過
遊行幸師倏然至載酒具殽饌四人語笑處識者知歎美
摩挲題宇在苔蘚忽驚徧壬寅到庚申風景過如箭驚心
半存沒歷覽步徐轉回思歡笑地嘗著郡侯宴今亦不能
來草木漫蔥蒨人間之廢壞物力費營繕不如姑付之猿

鳥自啼嘯

題姜堯章白石洞

詩眼玩塵世漫作威鳳鳴經行茗溪水乃見白石清拂衣
鑑須眉喚起仙骨驚胡爲墮人間難息百慮縈洞中應笑
我何不高舉輕明時樂未正尚欲追英莖他年淳氣合肯
有爵服情癡人莫說夢烈士徒殉名轉庵偶饒舌已足壓
旦評古來曠達者談笑得此生臨流賦招隱一奏朱弦聲

溪山堂曾宏甫作徐師川呂居仁曾吉甫王元勃鄭
顧道晁恭道王起巖吳傅朋徐明叔游咏之地

當年二三老曾醉溪山堂至今月露底草木有餘香興言
我良友六月此追涼還同章泉叟訪之以相羊夜久清輝

寒水際如雪光誰知幽絕處懷賢正難忘

休日靜居

寒餓迫我出忽忽兒女大原思樂商頌宋玉悲楚些吹面
薰風來刮眼春風過飛鳴鵲繞枝微逐蟻旋磨淪茗銷夢
事凝香理經課休澣得暫閒棲深淨趺座

送僧上懷玉

渺渺楓樹秋送僧上懷玉白雲度絕巘清寒滿深谷杖頭
掛薜蘿笠外見鴻鵠却笑懶殘隘隨緣受榮辱

寄潘文叔

揚子江心水可以共煮茶鶴林招隱詩不必問僧家治中
今何如紬被聽報衙去年崑山陽春岸醉桃花今年玉溪

上蚤忙看繅車相思無賸語作字只欲斜暑雨障炎日薰
風散餘霞君顏想渥丹我髮亦已華因詩一嘯吟塵間事
如麻

次韻鄭御帶苦熱

家山玉谿頭薰風水流烟小亭午夢餘清耳晚樹蟬本疑
老林下蕭散無窮年豈知一左計薄宦襲無錢塵埃京轍
底僦舍萬井連值此長夏熱愈覺歸爲賢故人忽念我樂
共湖山緣昨夜復大雨乘涼吟欲顛

寄葉解元

醉中曾寫雪色壁非此主人無此客夜寒烟雨池閣深秉
燭看梅忘墮幘春來相望鷺湖邊桃花滿地松拂天抱琴

挾書過飄泉想君風度尤翩翩

晚春

細雨收微暖輕雲起薄陰舟橫蓮葉淺人度柳花深佛屋
多支徑旗亭亦遠林一春思放浪盡日喜登臨

好仁齋夜雨與子似對牀

湖上歸來晚空齋夜雨聲對牀驚昨夢隱几話平生燈淨
書還讀香銷句忽成他年相望處吾亦用吾情

竹院晁學士挽詩

主客文風在家仍竹院名有孫宜世祿迺父本公卿事至
不如意人應爲失聲傷哉嵩里去書劒竟何成

二十九日寒食

曉色濛濛淡淡烟花間行過小溪邊人家寒食當晴日野
老春遊近午天吹盡海棠無步障開來山柳有堆綿呼童
覓友尋隣伴卽看村農又下田

何山有蘇滄浪蘇玉局詩乃唐何楷書堂也

亭上清詩得兩蘇空留精舍作僧廬地因人勝合題句山
以姓名緣讀書一徑虛明連別嶼小溪清淺過平湖筍興
少憩烹茶去轉覺秋來興有餘

寄劉小山武子老丈

秦淮東畔得詩人踏盡前朝陌上塵寺外殘陽見光宅苑
邊芳草憶臨春空餘王氣金陵古猶帶歌聲玉樹新羸馬
倦童應獨往舊時明月恐傷神

雪晴歸自湖圃

瓦溝殘雪滴春風
賸水殘山淡靄中
禽鳥不知人意老
數聲啼落野梅空

次趙將春日韻

立盡花陰把一枝
風流元自不如癡
錦箋欲寫相思字
誰記傷春病酒時

樓倚斜陽十二欄
重重烟水更關山
舊家心事渾如夢
千尺遊絲燕外閒

春江

半陰天氣近清明
柳色花光畫不成
行到遠村山盡處
一江春水縠紋平

呂定

定字仲安新昌人官殿前都指麾有說劍集

懷古

我昔遊海上東望三神山風波幾萬里蒼茫雲霧間魚龍
自掀舞天空日月間神仙渺無跡徐福去不還空餘蓬萊
閣千載留人寰

追和蘇子瞻遊峽山寺

山迴寶華閣水遶金鎖灣塵慮頓焉息於茲開我顏疎鐘
日夕動老僧林下還天風吹白雲悠悠滿松關歸猿有餘
悲月明嘯空山仙人自何來翱翔八極間手把玉芙蓉吟
笑鐙珮環歌罷忽飛去千峯堆翠鬟

赴京

太白樓前雨乍收，畫船撾鼓上皇州。
肯因離別牽愁思，要挹名事壯遊千里關河旗帶月。
一天星斗劍橫秋，胸中賸有安邊策，此去應當獻冕旒。

扈駕

八月秋高戰馬肥，觀兵郊外振天威。
一聲鳳吹迎鸞馭，五色龍文雜袞衣。
劍戟橫空金氣肅，旌旂映日綵雲飛。
令嚴星火諸軍奮，直斬單于塞上歸。

望嶧山

極目東山秀色濃，紫霄千葉醉芙蓉。
題詩尚記仙人洞，飛珮曾過玉女峰。
樹老孤桐秋露下，碑殘古篆暮雲封。
何時

再醉天門月卧聽清風萬壑松

金陵旅夜

一雨皇都萬象明東風嬌囀上林鶯
火煙亭館春多少鐘鼓樓臺夜幾更
枕上故園蝴蝶夢枝頭斜月杜鵑聲
銀牋欲寫長相憶滾滾江流不盡情

遊匡廬山

欲向匡廬觀瀑布便從彭蠡驟樓船
一聲長嘯來丹壑千丈飛流下碧天
洞裏樓臺無歲月雲中鷄犬有神仙
憑誰呼起巢松者醉擁宮袍對酒眠

度大庾嶺

鑿破鴻濛一竅通至今傳說九齡功
天垂瘴雨蠻煙外路

入炎荒火樹中萬里關河瞻北極兩行旌旆過南雄
鷓鴣聲裏端陽近榕樹青青荔子紅

謁金華寺六祖法堂

坐閱人間幾百年雙趺渾似後來禪
空空明鏡臺前地寂寂紅塵境外天
風動法林從虎過雲生咒鉢解龍眠
至今月到層樓上應共祥光午夜圓

章承道

承道武寧人

設醮洞霄因以古詩記其事

鶴鳴在野聲聞天靈壇夜醮朝羣仙
羣仙乘風駕雲輶一來自虛皇前
玉鑪不散香凝煙火中金縷光相連
仙宮

謂我帝所憐百拜向帝臣有言願乞臣母于斯年

李壽

濤字養真臨川人有蒙泉詩稿

登高邱而望遠海

登高邱望遠海萬里長城今何在坐使神州竟陸沉夷甫
諸人合薤醢望遠海登高邱知我者謂我心憂不知我者
謂我何求歸枕蓬萊漱弱水大觀宇宙真蜉蝣

詩友作涉江采芙蓉觸發鄙思亦成一首

涉江采芙蓉江水濕吾衣厲揭不憚煩將以遺所思所思
不我見持此將安歸野花逞姿媚衆好紛莫違此物何足
嘆但傷愛者稀

雜詩四首

滔滔東流水赴海無歸期
亭亭右轉日今茲復來茲
人生寄天地百年七十稀
思慮復營營恐爲達者嗤

燕雀賀厦屋蟲蟻慕腥羶
野花引飛蝶古木來嘶蟬
秋天百蟲吟春天百禽喧
翟公眞闇事喜愠見色言

明主不棄士我自志山林
爵服豈無華才疎力難任
鳥向深山棲魚向深淵沉
吾亦愛吾廬高歌復微吟

深岩有老翁龐眉鬚髮雪
夜半呼吾名授我微妙訣
字畫古篆繙體勢訛復缺
雙眸忽炯炯須臾竟披閱
至今得其傳心會口難說

爲廣壽長老文傑說嵩溪偈

隔江招手見高亭來謁松溪聽水聲縱是遠公今不出也
須強起送洲明

僧本均乞蒙泉稿

均號脩然

近聞甘子說僧裡有脩然詩學貫休體心參馬祖禪箇中
真有得名下豈虛傳索我蒙泉稿因風寄此篇

李自中

自中字文仲南城人有秋崖吟稿

初夏旅況

南山北山雨濛濛鎖斷翡翠千萬重茅簷剝啄鳥未散練
帶野水來相衝土堦沙草如箭鏃冷透簷簷清入骨雷公
挾斧渡長河拋擲牟尼三百斛一身蒲柳寄天涯白雲何

處栽胡麻江湖夏潦魚鼈亂錦袍夜月乘仙槎

麻姑山作

小小茅簷下清吟對此君溪深春漲雨山闌夜藏雲地溼
松花冷天晴樹色分猷門尋道士鷄犬隔離聞

送曾景建道州聽讀

晚節傷弓未足憐江湖因此累諸賢名標宇宙千年在事
屬朝廷萬口傳湘水有情空引些春陵無事早歸田多年
浪說飛昇識不擬如今尚悄然景建常爲余言某年某月某日曾極飛昇有金篆符

南昌樓贈符子威

占得南樓第一涼焚香終日話蒼茫客來酌酒烹茶外雜

採山花供藥王

春曉

門瞰青山侵草開
吟吟上最高臺
春風誰遣鄰家去
成陣落花吹過來

鄧光薦

光薦名剡以字行
一字中甫廬陵人
景定三年進士
屏居山中江文忠薦不就
後贊文丞相勤王
隨駕厓山除禮部侍郎
直學士院兵潰繫至建康
以黃冠放歸有中齋集

挽文信公詩

憶公淚懸河九地無處瀉
想公騎赤龍請命蒼梧野
世人

醉生死翻笑獨醒者焉知千載英精爽皎不夜義士無廢
興時運有代謝念昔喪亂初公騎使君馬奮袂起勤王忙
慨淚盈把須臾三萬衆如自九天下燈檠書檄交笑語雜
悲咤捧土障洪河一繩維大厦至哉朝宗性百折終不舍
身北冠白南血碧心肯化顏鉤凜忠勁杜詩蔚騷雅晉陽
骨肉寬東市刀兵解精誠揭天日氣魄動夷夏丈夫如此
何一死尤足怕田橫老賓客白髮餘息假有時夢巖電意
悟當飄灑非無中丞傳殺青自誰寫魂歸哀江南千秋組
鄉社

鷓鴣詞

行不得也哥哥瘦妻弱子羸

翅闊多網羅南音

漸少北語多肉飛不起可奈何行不得也哥哥

步月

盈盈當春月含情隔幽櫺好懷不自制起坐可一庭百蟲
未敢怨卉木正蔥菁餘光散草露乃復似秋螢

夜聞雨聲歸思浩然

西風響高樹鄉夢去帆前稚子衡門下先塋亂葉邊老來
多一出歸去恰經年海燕巢何晚秋期落爾先

午坐後亭

隔簾遲日午風微社燕驚寒未肯歸讀了丹經成默坐時
時一片杏花飛

望夫山

朝望夫暮望夫一夕化作山石枯
潮水去卻回行人來不來

題龍山鐘

豐山背後鐘霜月平原定夜半響
鯨音隱隱天地應山靈鶴夢醒
獨聽還獨詠蕭蕭蓬蒿中收入杜陵徑

避亂至烏巖山贈承節趙公

流水桃花又避秦
誅茅西崦結爲鄰
如公尚友浮邱伯
顧我早師梅子真
基酒從容新里社
衣冠蕭散古遺民
他年史傳收芳跡
應許牽聯作隱人

宗必經

必經字子文南昌人景定三年進士通判瑞州宋

亡入元世祖詔求江南人才留夢炎程文海交薦
固辭械至燕繫獄三歲放還有玉溪集

孺子亭

連天大廈莫容身小向湖邊一問津
心事說知林下郭姓名誤入府中陳
半篙綠水三間屋一榻清風百世人
只有青青隄上柳至今猶是漢時春

滕王閣

高閣連城十二闌西風領客共躋攀
半簾烟雨長空外千里江湖咫尺間
鴈帶秋聲歸別浦鶯分春色過巴山
當年蜺蜺知誰畫一夢莊周去不還

劉辰翁

辰翁字會孟廬陵人少登陸象山之門補太學生
景定三年廷試對策忤賈似道置丙第以親老請
濂溪書院山長薦居史館又除太學博士皆固辭
朱亡隱居卒有須溪集

送李鶴田入浙赴趙春谷招

天下南北車書通行人點點過汴宮空餘艮嶽一拳土黯
慘如雪吹不融平乘樓上王夷甫一流中外淚如雨西風
羽扇不障塵更是蓮子隨根去政事堂中三相公徃徃退
食如夔龍少年慟哭不見用一語不合面發紅八年流落
無處所合眼當朝竟如許忠魂不到海門潮別殿芙蓉廢
爲圃茫茫古路日平西不信金銅不淚垂浮沈親故嬾相

問白髮唯有春風知李侯髀肉堪流涕同谷哀吟越州弟
買絲刺繡刺未成公子翩翩鴈書至飄飄起望白雲間裴
雪牛車度赤山年餘七十能幾見我且欲往窮當還平生
高李經行處寂寞斷橋漂落絮不知到口似枯魚淚入黃
河別魴鱖當空殿閣密雪團曾和薰弦接羽翰至今尚留
花石否杜鵑再賦長恨端蘇州正念東鄰女傷心更遇楊
開府語言憔悴敢分明買酒行澆茂陵土

讀杜拾遺百憂集行有感

我生行年將七十不知何者爲憂戚富貴不驕貧賤安以
此存心度朝夕往年承乏佐中書大官羊膳供堂食只今
賜老作編氓衣食信天無固必陋巷簞瓢如素居不管茅

次春雨溼門前載酒求賦詩錦軸牙籤日堆積在官不置
附郭田既老翻得稻古力毀譽都忘月旦評姓名不上春
秋筆朝米不煩鄰僧送暮米不煩太倉糴我亦一飯不忘
君文人和輕所不及傷哉白首杜拾遺入蜀還秦勞轍迹
文章蓋世亦何爲妻子相看百憂集

龍霧洲雪

此處幾人行隔波搖暮晴洲迴江似玦山遠雪如城離合
看雙櫓荒寒又一程今年梅未醉最覺別來輕

夜雨

夜半起雷車天門報曉衙何消如此雨又有未開花繡被
人中酒茅簷客夢家一晴天地濶猶首見重華

清明日偶成

海日高高天欲斜
斷橋無復聽嘔啞
墓中酩酊已千載
陌上清明有幾家
已老愈疎唯酒盞
更晴相覓是梅花
年年春怨深如昨
莫把無涯作有涯

初晴

初日入高樓
歸雲雜江樹
魚游新雨晴
鳥語晨光吐
天容起復覩
烟色轉輕素
牆草麗車前
巷溝映泥路
窻明祛宿潤
礎泣滑微步
會朝有客宿
過午無來屢
沿砌上嚙衣
虛庭竿犢袴
人生足無事
世故非所慮
彼語吾不聞
清風有時度

戲題

無人知坦腹水影半簾苔驚謂青蟲墮垂絲忽上來

春歸

留春一日不可種樹十年未成芳草斷腸花落綠窻攜手
鶯聲

宣和雙蟹圖卷

講餘幾暇諫書空艮嶽江湖入眼中郭索能令天一笑畫
圖何必面春風

沙苑箭

道人不在無人茶空房惟有菖蒲花偶留壁上一枝箭熟
視恍惚令人嗟箭頭年月去如電吹向空中再相見亦知
近事不偶然汝亦當時負吾箭神仙一劍在吾手萬事空

驚一搔首馬鬼重過雨淋鈴異日臨邛是君否

月下

月色爲酒吾爲壺仰天吸盡欲更沽世界如入流離珠東
南大半江海湖微風白浪如搖鬚子從我也有意無跳身
作勢與浪俱嘗試入此觀何如惜哉畏死非吾徒嘔出還
爾桑田枯仙人嗔我漉六銖醉中無力能分疏汝自失脚
如逃遁彈指咄咄汝負吾

題墨竹長卷與汪遂良

摩訶池上龍千年化爲匹練橫曳煙拔石數莖衝蒼天我
見其面何必全

留京

遠夢孤難到憑高烟景微重留山僕怨數里別人稀
病用寒衣盡書無定日歸十年行役事俯首輒歔歔

輓蔡西山

四海朱夫子徵君獨典刑青雲伯夷傳白首太元經
有客憐孤憤無人問獨醒瑤琴空寶匣絃誦不堪聽

餘興

江國遲歸二十年十年兩繫峽江船身如梅子半晴雨
路入柳花相後先堠短堠長春繫馬江南江北夜間鵲
人生老大空無用寄語羣兒早著鞭

重陽

風流九日勝前期誰把茱萸壓桂枝天地盡從騷國老
風

煙何似蔣陵時故人四海知誰健白髮黃花總奈吹滿座
衣冠陳迹遠明年復憶去年詩

壽周耐軒府尹

時方歸自燕

去日江南梅未花歸來芳草漲天涯驅馳斥堠八千里夢
寐青原十萬家白叟倚門清燕寢黃童騎馬學胡笳八陵
盡是燕京路想爲孤楸訊暮鴉

壽王按察

試手東南第一才江南知己是寒梅山中四老衣冠起野
外諸生俎豆開天運又從今日始江空如見老翁來清平
笑語皆文物早起書雲認魯臺

許煉師攜手求題

養就金童姹女精松風蘿月寄閒情廣寒桂樹商飈起咫尺浮黎白玉京

山行雨中

雨行如漏篷側身半車中風翻荷葉白難可爲芙蓉向來三重茅仰屋歎穿空已經亂離苦志念常從容

入城過新雨路靜市人稀吾家林塘間水鴨狂欲飛門闌稚子笑隔樹見翁歸何人無此樂頽暮樂知希

和答李德臣

忍寒一百五何開落恩恩華堂託孤根棄我荆棘中味言隨時變茗薄酩酊白濃蛺蝶金縷衣更爲悅已容雖無蛾眉妒懷抱常冲冲

寄別孫潛齋

常笑唐衢生一慟可以死焉能流涕被面日日別知已又
常笑朝鮮無淚可沾巾悲歌兩語爲我吳婦人平生鍾情
重離別一聽陽關腸一絕銅駝陌上曾逢君誰料相忘如
永訣昔攜手青春春水一笑禊吏塵醉能強歌醒能賦滿
坐唯有孫堯文酒闌歌斷如轉燭寒食鼎鼎新鬼哭丞相
書桐吳鳥巢曾園仙市芳郊綠海棠三迳無根扶敗瓦顏
垣亦已鋤舊遊勿感有至此獨爲吾黨權區區我欲與君
重一到化爲長瓶醑荒草早知世事去如風只合黃公壚
下倒當時一醉鋪埋我不見興亡應更好且復止此休云
云我有臣子高能文令其講罷日就君就君歸日誦所聞

吾貧吾老不足念君鬚君髮何年變幼安九十愁更愁空
羨一生長樂傳嗚呼斯人斯世不相見綠樹鶯啼淚如霰

文姬歸漢圖

鶴巢覆絕孔文舉錦衾裹葬楊德祖銅雀春風歌舞長獨
復悽然故人女故人有女勝無兒滿腹興亡身屬誰琴燒
笛折箏灰冷開卷草深歸鶴飢美人用事單于國細馬駝
金爲余北曾從過鴈借書看又向枯魚寄聲得胡笳日聽
心自哀天遣前朝漢使來穹廬抱子送于野欲去欲住真
難哉大兒牽衣小兒乳割乳分攜淚如雨跋馬兒啼漸不
聞腸斷一如初遇虜畫圖巧畫欲無聲不盡賢王于母情
踟躕拳踟各有態未必日莫分馳能天長地久何終極事

已不堪回首覓草無南北是青青雲有朝昏長羈羈琵琶
恨絕妒難消海上羝兒夢豈遙入見玉關天似錦歸從金
馬晚當朝容儀憔悴恩無骨記問荒唐存又沒衛郎去我
墓何斯魏史親人禮難越當時一女贖元身亂代流離更
可聞天南地北有歸路四海九州無故人

贈製筆生許文瑤

許生精藝誰可及材用剛柔以製筆水盆洗出紫兔毫便
覺文章生羽翼蒙恬將軍爲動色爲是秦王舊時物丞相
斯曾從駕行載此篆書封禪碣從秦至今幾千載免尚存
皮竹可採利濟天下功不有入手千人萬人愛我昔爲郎
居粉署用筆唯于許生取輕衫日對紫薇花寫遍江淹夢

中句

蘇李泣別圖

事已矣泣何爲蘇武節李陵詩噫

周耐溪見訪

麥逕縈紆縮寄蝸傳呼驚倒望前牙能忘特進羣公表來
訪尋常百姓家草市波喧騰騎竹柴門路隘簇鞍花屏窺
不信雌同甲爲信高明兩鬢華

漁歌效陳自堂作

石頭城落淮水劉郎浦對伍洲越沼吳湖安在月明人唱
湖州

春晴

江柳長天草色齊
新晴何物不芳菲
無因化作千蝴蝶
西蜀東吳欸欸飛

新燕池塘綠雨肥
初晴未暖日光微
角巾猶帶花梢濕
纔倚闌干見絮飛

探梅

江天欲雪未雪時
絕江探梅驢倒騎
空中著我方成畫
亂後逢花且賦詩

釣天遠遠月斜斜
歸客迢迢未到家
一色白雲天似雪
和衣和雪宿梅花

後五百年無放翁
狂歌醉舞與誰同
漁人入得桃花洞
猶有梅花路未通

冷盡何心識老逋芳名從此落西湖風霜未改幽堅操弟
立花前諱玉奴

楊應登

應登字幼平臨江人有德行言辭七試國子不第
退就耕牧老于南塘

水宿

水宿逢今雨春歸返故園聖朝臣已老往事客何言乞米
分鄰里看書到子孫蒼茫不可會一笑了清樽

寄趙梅州

江城雁呌天如水寒色蒼蒼草木死哀歌未斷月東出有
才無命可流涕今我不樂思梅州束帶深衣百僚底天下

規矩見卓絕龍章麟角諸公子白頭時節得蠻府歸來閉
門呼不起惆悵平生狗馬病風后力收長已矣爲公問酒
日日酤熏天富貴憂患始

晏 又

父字明粲宜春人風度秀整主趙崇澶後澶逮繫
父自請詣獄俱以瘐死

訪吳

平生一語不肖吐浩然披髮行西林美人十日跨驢出黃
葉堆門雲雪深

夢中

春樹年年少寒雲浦浦連片帆高浪起斗酒夕陽偏沙市

懷司馬州城笑老邊太平冠蓋盡爾敢望諸賢